



«Jeu stuevel esser detscharta»

Sora Amalia Caplazi, dapi 64 onns en clastra a Glion

DAD AUGUSTIN BEELI / ANR



Per sora Amalia Caplazi varga in onn 2019 commemorativ.


■ **Il settember vargau ha la cuminonza dalla clastra da Glion festivau consoras ch'han giu il giubileum da profess. Sora Amalia Caplazi, oriunda da Surrein, ei stada ina dallas giubilaras. Ell'ei dapi 64 onns commembra dallas soras da Glion. Denter auter ha ella menau la scola da tgirunzas.** 71 onns ha quella scola existiu. Ella ha giu in bien num sco emprema scola da tgirunzas dil Grischun. Avon diesch onns ha la regenza grischuna decidiu da buca pli renovar il contract da prestaziun e da centralisar la scola a Cuera. Per sora *Amalia Caplazi* eis ei stau in cumiau definitiv d'in'epoca

ch'ella ha sezza influenzau. «Igl ei stau in si ed in giu», resumescha la dunna che cumplenescha en in meins 85 onns. Ella ei ina persuna da statura plitost pintga e da preschientscha mudesta. En siu vestgiu da dominicana sedistingua ella nuotzun da sias consoras. Ell'ei ina da 100 dunnas che vivan ella clastra da Glion. Ella s'auda tier las attempadas, quei ch'ins s'encorscha buc, pertgei el raschienen serevela in spért allert ed aviert. Sora Amalia ha festivau il settember 2019 il profess da diamant. Il settember 1959 fuva ella s'empermissa per la veta monastica. Tuttavia buca sco muniessa

en ina clastra serrada cun grossa miraglia e contact mo cul Tutpussent. Il cuntrari ha animau ella d'entrar en clastra. Cun perschasiun eis ella entochen oz sora dominicana da Glion.

S'obligada all'obedienscha

Las soras a Glion han surviu, accumpignau, assistiu, sco tgirunzas, scolastas, mussadras e hospitontas, en scolas, instituts, scolettas, casas da vegls e spitals. La giuvna da Surrein haveva 24 onns ch'ella ha empermess d'unfrir sia veta all'ovra sociala. Sia finamira oriunda fuv dad ir ellas missiuns. Cun quei scop fuv'ella



entrada 1955 sco noviza ella cuminsonza dallas dominicanas da Glion. Ella fuva lu buca persula. «Glion haveva grond'acoglientscha e mintg'onn biaras novizas. Las soras da Glion fuvan enconuschentas pervia da lur mentalitad aviarta», raquenta sora Amalia. Ella fuva sedecidida per Glion, e buca per Ingenbohl ni Menzingen, duas autras congregaziuns enconuschentas. «Il spért aviert da Glion ha attratg mei», declara ella. Sora Amalia ei naschida 1935 a Surrein sco Angelina, secunda da siat affons dalla famiglia Caplazi-Desax. Siu bab, igl impressari da lenna Placi Caplazi, ei staus 21 onns president communal da Sumvitg.

In spért religius, denton buca serrau e conservativ, ha influenzau si'affonza. A Baden ha la matta da Surrein absolviu in praticum e frequentau cuors. Gia adina vulevi ella daventar tgirunza ed ir ellas missiuns. Sco postulenta e noviza ha ella fatg il diplom en quella clamada. Naven da 1955 ein ils onns intensivs suandai. Ellas missiuns ha ella buc astgau ir, per tgei cul profess perpeten, quater onns pli tard, fuv'ella s'obligada all'obedientscha dalla cuminsonza. «Nus duvrein Vus ella scola da tgira», haveva la priura generala detg ad ella igl onn 1960. In onn suenter ch'ella fuva s'empermessa ha sora Alfonsa Heckmann eligi in'otra via per la giuvna mungia. La scola da tgirunzas da Glion fuva en cumplein svilup ed ella ha entschiet a dar scola leu. Vitier ha ella frequentau cuntinudamein cuors da cader per clamadas da spital. Lu deva ei el Grischun aunc negin'otra scola da tgirunzas. L'instituziun haveva gest contonschiu la renconuschientscha cantunala, quei ch'ha garantiu las subvenziuns ed igl

equiliber finzial. La fundatura dalla scola da tgirunzas da Glion, sora Pia Dominica Bayer, haveva installau ina scola ch'ei daventada enconuscenta e respectada lunsch suls cunfins grischuns.

Cantun ha fundau «concorrenza»

1970 ha la claustra confidau la direcziun ad Amalia Caplazi. Ell'ei stada l'emprema e la suletta Sursilvana ch'ha menau la scola da tgirunzas. Ella retrospectiva conceda sora Amalia ch'ella eri lezs onns bia memia strentga. En scadin cass ha ella dau anim al menaschi ed ha giu quitau da sias scholaras.

Sis onns avon haveva il cantun entschiet a realisar in sistem parallel ed etablir ina nova scola da tgirunzas. Ins ha fundau a Cuera ina «concorrenza», la Scola evangelica da tgirunzas. Per la scola sursilvana, l'originala ed etablida, ha sora Amalia viu la smanatscha, mo era las schanzas e las fermezias. Ella ha giu bien contact e buns raschienen culs cussegliers guvernativs Otto Largiadèr e Tobias Kuoni. Ils schefs dil departament da sanitaad apprezzavan ils arguments dalla menadra dalla Scola da tgirunzas da Glion.

Resolut e cun saun giudezi ha sora Amalia menau la scola tochen 1981. Quels onns deva ella scola e cuors a Glion ed a Cuera, dirigeva il menaschi cun recrutar scholaras e naven da 1977 era scholaras, organisava il project da baghegiar dil tract niev, coordinava cun uffecis e spitals da praticum, batteva encunter ils plans da centralisar a Cuera.

Zacu eis ei stau damemia. Suenter 11 onns ha sora Amalia buca pudiu pli. Ella haveva 46 onns e fuva els megliers onns

da sia veta. In onn pli tard han ils miedis dil Spital regiunal Surselva, dr. *Walter Schenker* e dr. *Urs Strässle*, giavischau ch'ella surprandi il post sco menadra da tgira. Sco persuna pragmatica ha ella defendiu vinavon ils interess d'ina tgira senza schicanas administrativas e politicas. «Biaras han buca capiu decisziuns ch'jeu hai stuiu prender», manegia ella mirond anavos. La claustra da Glion haveva surdau 1972 il spital regiunal ad ina nova corporaziun da spital dallas vischnauncas sursilvanas. Per las soras da Glion fuva la carga finziala cun deficits cuntinuui daventada memia greva.

La finala ha il cantun tonaton centralisau 2011 a Cuera la scolaziun dallas tgirunzas. Igl ei stau ina petra fin suenter varga 70 onns da svilup cuntinuau, per la claustra, per Glion e per l'entira regiun. Igl anteriur baghetg dalla scola survescha egl avegnir sco residenza per seniors cun habitaziuns e survetschs accessorics. Sora Amalia ei stada colligiada directamein cul spital da Glion tochen 1990. In onn pli tard ha il caumiedi dr. *Walter Schenker* puspei giavischau ch'ella assisti e sustegni el tier in davos project: Schenker ha bandunau il spital per fundar in'atgna pratica a Valata.

El ha duvrau ina specialista dil sanitaresser che saveva manischar, organisar e luvrar, ina sora dominicana cun liung'experientscha ed affinitad per la chirurgia. Tochen 2001 ha sora Amalia surviu a quella pratica cun pazients indigens e hosps d'ina vasta regiun. «Jeu sun cuntenza cun mia veta», di ella aunc ina gada. En quei mument scalina il telefon. La sora vegn aunc adina duvrada ed ha in triep pensums enteifer la cuminsonza dalla claustra.